

吉安府志卷之十九

列傳二

明朝自國初至正德

羅復仁 解開 周肅 劉迪簡 王伯温

黃九衢 胡子祺 李亨 朱吾進 王沂 王佑

劉仲啓 蕭岐 歐陽韶 張衡 陳仲述 李卷

吉安府志

列傳二

陳誠 尹昌隆 鄒緝 劉子敏 梁伯興

張伯穎 王潛 周述 周孟簡 李昌祺 羅汝敬

宋子環 張宗璉 張叔豫 余學夔 蕭時中

陳衡 王彥 熊槩 朱與言 陳正倫


陳循 彭琉 周叙 周源 曾鶴齡

劉廣衡 孫鼎 郭循 曾泉 張景良

劉雋 蕭翼 梁潛 李湘 蕭和鼎

蕭啓 王佐 吳節 萬霽 李紹

蕭暉 蕭鎡 曾暈 陳文 王貞



左鼎

周鐸

陳宐

劉錯

楊渙

劉孜

羅俊

劉宣

彭烈

劉敷

王臣

彭華

尹直

劉鈺

傅韶

劉珂

康驥

馬聰

彭教

羅璟

阮玘

蕭禎

張達

龍伯

袁道

劉戩

曾彥

周淵

張寅

歐陽日

李貢

王懋中

劉丙

周孟中

鄧鼎

曾顯

鍾鯨

曾望宏

彭龍

徐穆

周魯

鄒賢

劉潮

劉子履

周尚化

吉安府志

列傳二

二

元

劉翀

羅復仁吉水人少嗜學博覽經史尤通天文書初偽

漢辟為翰林編修復仁知友諒盜雄非帝王器遁

去壬寅大明兵取九江復仁杖策來歸

太祖甚喜置左右癸卯從破友諒於鄱陽齋蠟書招

袁臨吉贛諸郡甲辰友諒子理固守武昌不下

命往諭降之擢國子監助教以老故賜小車出入

每宴見賜坐命飲丙午使山西反覆以天命人心

曉譬之壙廓威悟洪武元年遷翰林編修二年齋

詔諭安南歸所侵地安南遺金貝土物甚多却之  
大祖聞其事益義而嘉之隨拜弘文館學士復仁敦  
茂簡樸若草野倨侮而胸中了了

大祖與談率意陳得失無所顧避常操南音以對  
大祖顧賢其質直呼爲老實羅而不名嘗幸其第復  
仁方操塗具完壁急呼妻抱兀坐

上上曰賢士豈宜居此命工部賜第城內遇  
天壽節製水龍吟一闕以獻

上悅厚賜之尋乞致仕許之陞辭 賜大布衣題其

裾曰性雖粗率忠直可喜賜汝布衣放歸田里久  
之復召乘傳至京師奏減江西秋糧軍籍等事  
上憐其老留三月乃賜玉帶錢杖裘馬食具遣還于  
家復仁從容侍帷幄隱玉於璞深受

上知始終無替以壽考終有玉堂倡和集行于世  
解開字開先吉水人元末入胃監會 大明兵起乃  
還時吉守臣欲棄地散去開往見爲畫計招撫羣  
雄吉郡賴以安保遂隱跡山中 國初徵至京  
命爲本學司訓誨迪有方吉水人 國朝文學之

盛自開始開軒豁有才辨對客揮毫談論不輟所  
著有文集四十卷

周肅吉水人仕元至中順大夫樞密院同知 國初  
召元故官一十八人赴京聽用肅在召中至授御  
史臺都司洪武二年以直諫稱 旨受文綺楮幣  
之賜尋陞湖廣按察司副使六年以才堪守備選  
擢河南知府八年丁內艱遣官起復于其家授戶  
部尚書凡戶役田賦軍需度支經畫悉當  
上器之贈其祖吉安知府父如巳官尋以戇直忤

吉安府志

列傳一

四

廢

旨卒

劉迪簡字商卿安福人博覽五經 國初甲辰二年  
徵起授尚賓館副使陳時務五十條洪武元年撰  
皇王大學旨要一書疏進尋因火旱求直言應

詔陳時事二年六月差往汴陝訪採前代政績筆削  
成書以獻三年四月差赴交趾竣事歿于南寧府  
井龍縣官歸其喪有文集行于世

王伯溫吉水人氣岸魁偉進退循理偽漢陳友諒強  
辟之不起謂友人曰仕當待明主洪武初以明經

徵同徵者皆任顯秩伯溫懇求教職曰臣世業也  
以爲武寧教諭

黃九衢字伯路吉水人積書萬卷杜門晝夜誦之不  
輟幾十年六經諸史百家天文地理律曆筭數禮  
樂兵刑古今制度無不精覈爲文一傳於理落筆  
萬餘言不屬草北遊大都歐陽原功揭文安黃文  
獻皆待以國士洪武初辟爲本學訓導守令踵門  
問典章政事其所籌畫皆可施行所製渾天儀刻  
漏壺尤爲精巧云

吉安府志

列傳二

五

高

胡子祺名壽以字行吉水人洪武初舉明經同試凡  
十八人是日太史奏有文明之祥 命賜以宴皆  
除監察御史嘗建言請都關中謂金陵非遠久計  
擢廣西按察僉事久之改知彭州陞延平守俱有  
善政性軒朗博學廣記以詩文著稱

李亨字觀泰吉水人洪武初以人材舉授磨勘司丞  
陞司令官至蘇州府知府以父艱去

大祖遣使 勅諭之曰朕嘗思之自古創業之君必  
由賢能而興又必以賢能而治爾李亨襲職諸司

並不見贓私以干憲章縱使古之廉潔者亦不過如此而已卿自守服以來朕未嘗忘也想所用艱辛特差人賜卿糧米五十石鈔二百五十錠爲卿守服之用卿當恪恭以孝服滿來朝分理庶務爲生民福故茲詔示想宜知悉

朱吾進吉水人洪武四年舉人材授浙江衛知事改燕山衛諭令致仕歸賜以勅曰朕觀古今賢能者遇君有遲速名彰有先後奈何時運之不齊衰壯之相臨何謂蓋壯志真而名未出君將知而

暮年垂雖有賢能爲斯所難燕山衛知事朱吾進久歷諸司每稽無疵特命中書下吏部召見轉官乃蒼顏皓首縱有自強之志終是年高故加陞品以養老於家今授爾爲徵仕郎比平府經歷致仕爾往欽哉

王沂字子與王佑字子啓泰和人父以道在元季有隱德張伯剛薦之仁宗辭不就遇異人得養生術元亂寇過西昌每指其廬曰此王隱君家也相戒勿毀去沂佑兄弟俱明經營一試有司不合卽棄

置 明興邑既內附佑始舉明經除監察御史明年沂亦徵爲說書既至上書論事授福建鹽運副使以老辭歸佑爲御史獨持風裁出爲廣西僉事凜凜有聲徙知崇慶州坐累罷歸沂佑平生孝友最隆篤居必堂序出必鴈行學者望沂如大阿在匣玄酒在尊可親而不可狎佑則如烈日秋霜無不肅然起畏者沂子泰字伯貞仕爲廣東僉事分巡雷州又爲瓊州知府既去祀名宦祠

劉仲啓泰和人性剛毅不事家人生業讀書通大義

吉安府志

列傳

七

四

劉尚書崧甚見稱許洪武初徵授陝州判官始至吏猾政梗欺僞叢生仲啓剔其尤者痛治之民害以息俗信鬼公署傍有召公祠常夜見四美婦携燭出入民異之爭相禱祀仲啓曰召公豈爲是必妖也察其蹤得二狐於祠前之塔下立殺之又見祠傍池蓮鮮媚令人剪除池水盡赤自是無爲妖者

蕭岐字尚仁泰和人性端重少孤善事其祖父母以孝聞自世變以來禮法廢缺閭巷縉紳徵逐讌飲

不爲訾詬尚仁屹然以身維之每在座客皆歛容  
諸少侍者雖隆冬常汗語少不當則端坐不荅四  
方學者傾仰之故教立而道尊洪武初郡縣強起  
應 詔既入覲首以十便書進獻稱 旨賜宴右  
角門時天下有司舉賢良至皆許得自擇一官岐  
曰<sub>臣</sub>年六十衰矣無能爲用<sub>臣</sub>言可行惟

上行之不願官也 詔不允明旦 召入特授潭府  
左長史不拜如初辭遂留居京師官給珍膳月朔  
望一入見歲餘授平涼訓導先是曾夢見其齋中

益安府志

列傳二

八

元

具景至則盡如所見益安之教大行屯營守帥及  
崆峒之夷皆遣子入學復以考定典籍徵入

賜宴奉天門對揚屢稱 旨居闕月得請歸六年卒

歐陽韶字子韶永新人洪武初薦授監察御史時

高皇帝威斷莫測日命御史一人侍班刑賞有失中  
不諫止則罪之一日子韶侍適見乘怒將戮一人  
他御史不敢前獨韶趨進跪舉手加額莫知所措  
辭但連呼 陛下不可不可 天顏爲霽其人得  
從輕與後告老終于家



張衡字子平萬安人洪武十八年登進士授禮科給事中二十二年擢禮部左侍郎奏定洪武禮制禮儀定式歲行郊祀選百官行最者分獻衡與焉

大祖屢嘉其廉慎以其事載

大誥中每 召呼爲瘦張而不名年四十以忤 旨

卒

陳仲述名繼先以字行泰和人少從劉槎翁學洪武十八年進士授監察御史篤志潔修居官十年一布被猶書生時故物時進士名能古文者皆推仲

吉安府志

列傳一

九

工

述第一 懿文太子稱之曰陳古文子賞登第官按察司僉事其清苦一如仲述

陳誠字子魯吉水人洪武甲戌進士授行人 詔往北平求賢山東蠲租安南諭夷皆能不辱命還陞翰林檢討署院事永樂初除吏部驗封主事尋陞員外郎扈從北征陞廣東叅議時西域撒馬兒罕諸蕃國皆遣使入貢 詔誠報之跋涉險阻暮年乃至宣布 朝廷威德還以西域志進

賜予甚厚推廣東叅政遂乞致仕誠居官畏慎守職

不妄與人交居閑三十餘年絕口不挂外事徜徉  
泉石超然世外時人高之

尹昌隆字彥謙泰和人洪武三十年進士授翰林修  
撰改監察御史建文卽位初朝晏昌隆諫曰

太祖高皇帝鷄鳴而起昧爽而朝未嘗日出臨百官  
百官于是戒懼故能庶績咸舉天下安也

陛下嗣大業固宜追繩祖武兢兢業業憂勤萬幾未  
明求衣日昃忘食常如不及今乃溺于宴安日刻  
甚晏猶未臨朝羣臣宿衛疲伺廢業上下廢弛臣

吉安府志

列傳一

十一

又

恐播天下傳四夷非社稷福也建文君曰昌隆言  
中朕過禮部可頒示天下使人知朕過元年京師  
地震昌隆疏言奸人專政陰盛陽微謫見于天執  
政大怒斥爲福寧知縣未幾中使誣昌隆詛說下  
獄事白得釋靖難兵南下昌隆上書言今日時勢  
日去而北來章奏言周公輔成王不若罷兵息民  
許其入朝彼旣欲申大義于天下不應便相違戾  
設或有蹉便須讓位不失守藩若沉吟不斷禍至  
無日進退失據雖欲求爲丹徒布衣不可得矣不

報靖難後昌隆名在奸黨驅出就戮昌隆當陞大呼曰臣當時曾上章以讓位爲言今奏牘尚在可覆也命緩昌隆刑檢奏有之

上曰早依此言南北生靈免受酷禍朕亦無此勞苦遂貸昌隆死未幾以爲北平按察知事行部主事預備議進左中允漢庶人惡昌隆改爲禮部主事尚書昌震喜屬官諂忌昌隆誣昌隆與谷庶人通謀論死籍其家震病時時號呼乞解曰尹相尹相妻子問其故曰昌隆守欲殺我震竟死

吉水府志

列傳二

十一

鄒緝字仲熙吉水人洪武中舉明經授星子訓導入爲國子助教永樂初遷翰林檢討歷陞左春坊左庶子兼侍講緝性清約其貧嗜學見異書必露抄雪纂不輟簡入詞林列禁從屢典會試文衡預修大典及洪武實錄緝居官廉靜慎許可人不得干以私以是受知

成祖行書尤爲精絕子循洪熙間舉明經以訓導累遷至翰林修撰卒以剛介稱

劉子敏名祿泰和人洪武中爲山東御史卓有能名

以言事忤權貴黜為候官令又言事又降候官典  
史益修其職嘗自署曰祿薄儉常足官卑棄自高  
永樂初徵拜河南道御史尋陞山東按察副使  
賜錦衣綺泉楮幣乘傳之官改湖廣廣東以疾辭  
歸卒

梁伯興永豐人洪武中以明經舉除同知真定府至  
則因俗為治撫摩其民不事筆楚民咸德之以善  
政聞擢應天府丞以耿介著聲改知梧州府  
六祖嘗以老實呼之後 召至京查理刑科事嘗命

志文府志

列傳二

十一

一

誡日本國 詔稱 旨陞河南右布政使既致仕  
坐郭桓累籍其家惟書數帙而已被逮至中道卒  
上聞而哀之 命復其家

張伯穎吉水人洪武間鄉舉任教諭永樂初以薦  
召為翰林五經博士與修

高廟實錄永樂大典歷陞修撰平生謹已如執玉儀  
度儼整雖盛暑亦衣冠終日危坐閒居無傲言慢  
色人嚴憚之

王潛字澄淵安福人革除己卯鄉薦授梓潼知縣陞

祿勸知州荊州府同知所至清操自勵有惠政俸  
餘輒以濟人居官二十年家無少積蓄既乞歸開  
門授徒講論不輟餽粥僅可免饑其在梓潼時仙  
人馬犀峯嘗過與語約潛至其所居潛初至一橋  
峻絕非凡境再至一橋兩岸蒼翠風颭然非人間  
世矣馬謂潛曰公潔白如冰雪恨不可與俱耳授  
以桃粉爲別潛服之童顏無疾年九十六而終  
周述字崇述吉水人永樂甲申述與從弟孟簡並及第  
成祖文皇帝特賜親閱試策手書述卷曰瑰瑋之

吉安府志

列傳二

十三

文

文充實之學書孟簡卷曰辭足以達意學足以明  
理兄弟齊名古今罕比並授翰林編修入文淵閣  
讀中秘書述預修永樂大典扈從北巡累進左春  
坊諭德兼侍讀從皇太子居守南都

上諭述曰汝素重厚道途尤資匡弼太子雖聰明  
純謹然知或未逮行或過中必須盡言庶稱朕意  
仁廟居守中外無失政德澤浹於人心述力爲多宣  
德中陞左庶子兼秩如故正統中謝病歸孟簡在  
中秘二十年始遷詹事府丞一日詔擇文學端

慎之士侍臣以孟簡進特命孟簡爲襄王長史侍臣密奏宜留孟簡備顧問

上曰輔朕弟尤勝於輔朕也述溫厚儒雅未嘗見疾言遽色尤篤交誼孟簡謙厚不伐生平無睚眦於人兄弟並列侍從一時稱盛焉

李昌祺名禎以字行廬陵人永樂甲申進士改庶吉士預修永樂大典敦勤自效授禮部主客郎中春曹獨主客號劇冗昌祺理之裕如無所留事尚書呂震以嚴窘折屬而獨敬禮昌祺無何簡任廣西布政使丁內艱去

吉安府志

列傳二

十四

文

仁廟在東宮雅賢昌祺及卽位昌祺起艱入覲上曰此佳士卽日改河南其爲河南廉介自持雖復負才智不炫爲竒細治務寬簡以故吏憚民懷治聲大起尋引疾免歸昌祺自竒其才器謂當輔世乃位儉於方伯由是發憤著書以見其感慨儒生家或短誚之然昌祺自委質立廉以終其官旣歸無改其寒素逍遙蓬門書史自娛工詩文李古廉亟稱之言其無不備也

羅汝敬名肅以字行吉水人永樂甲申進士選庶吉  
士尋除修撰陞侍講洪熙改元上疏陳言時政十  
五事遷御史宣德間交趾黎利反命大將王通  
討之不利進汝敬工部右侍郎往諭之王通業已  
與黎利和道遇汝敬固止汝敬毋往汝敬弗聽疾  
馳赴之黎利駭愕郊迎汝敬因責以負國家恩  
信宣道德意詞氣壯甚黎利懼服遣使隨汝敬入  
朝謝罪且請立陳氏之後暘

上大悅復遣使黎利因言暘已死會張樂宴汝敬讓

吉安府志

列傳二

十五

文

之曰暘固而主也暘死而國人宴樂何忍命碎其  
飲噐一坐盡驚遂陰欲加害汝敬夜焚香禱于天  
已而國門火起大風拔木屋瓦皆飛延燒千餘家  
黎利震恐伏罪鑄金人贖表謝恩餽汝敬甚厚悉  
却之遂與使人入朝

上賜汝敬玉帶召入問黎利事欲再加誅汝敬叩頭  
解方釋出督兩漕漕運奏減荒田稅糧又奉

勅河南山陝賑濟奏寧陽侯陳茂大監王安追其所  
侵奪田數萬畝奏立運法以紓民力置河渠官以

興水利舊倚為奸利者不便構飛語謗之汝敬歸  
自陳 詔勿問督運如故未幾 召還致仕卒所  
著有寅菴集

宋子環字文瑩吉水人永樂甲申進士選翰林庶吉  
士授吏部主事進郎中宣德初選梁王長史尋改  
越王長史卒于官子環孝友溫夷未嘗睚眦人澹  
於世味不能脂葦取容歷官幾三十年竟翫齷以  
終卒之日貧不能舉喪子懷陳情於 朝得賜給  
官舟護喪歸所著有詞林梁園南行諸稿

吉安府志

列傳

十六

山

張宗璉字仲器吉水人永樂甲申進士由翰林庶吉  
士授刑部主事嘗錄囚廣東出諸誣服賴全活者  
甚衆洪熙初擢左春坊左中允宣德初陞大理寺  
丞尋清戍閩中事竣改常州同知有御史按郡清  
軍銳意以得軍為功嚴刑逮治民受枉抑宗璉力  
諍御史嫉其異已詬詈之不為變竟白其枉然坐  
憤懣疽發背卒常民哀之建廟君山祀焉語在楊  
文貞所為廟碑中

張叔豫字順動永新人永樂間進士選庶吉士與修



永樂大典大擅時名朝士多重之後出判安慶平  
權量禁奸蠹進諸生講學不倦居常蔬食無改布  
素坐註誤得直命督工房山遘疾卒豫問學克瞻  
居家孝友平生不苟取予精易學鄉士出其門者  
皆有名於時又與李伯尚劉髦友善邑稱三君子  
所著有忍菴稿藏於家

余學夔字一夔泰和人幼時讀書卽知以窮理爲要  
永樂甲申進士選庶吉士預修永樂大典授翰林  
檢討又預修五經四書性理大全晉侍講兼修國

史宣德間預修 兩朝實錄書成當遷學夔上疏  
乞致政去平生負直氣非所當得一介不取家無  
餘貲而博古好學孜孜不倦以終其身云所著有  
北軒集

蕭時中名可以字行廬陵人永樂辛卯狀元及第授  
翰林院修撰 詔纂修四書性理五經大全時中  
溫厚循謹貌若不自持然內守甚堅雖細務必審  
檢嘗因奉天殿災陳言八事能盡時弊優裕婉引  
皆見聽納無何以疾卒于官

陳衡字紹隆永豐人永樂辛卯進士授御史歷巡按廣東河南陝西丰裁表著秩滿遂自引去家居布衣蔬食無一壠之植以遺其子孫薛文清公稱其論列時宜推讞疑獄按歷藩岳疏通明慎而清白之行如良玉瑩潔其爲人可槩觀矣

王彥字世俊安福人永樂辛卯進士授刑部主事至郎中左遷雲南都司斷事用薦擢潞江知府持已廉白愛民如子以禮爲治嘗曰民雖至愚而神竭誠以待之有不格必吾誠有未至也暮年郡中翕

吉安府志

列傳二

六

立

然嚮治一令出民惟恐不如令新學校興士類勉以孝弟廉耻凡百廢墜振舉無遺既引年歸潞江士民號泣如失父母爲立祠祀平生介特一事不苟敦信秉禮老而愈篤

熊槩字亢節吉水人初姓胡旣仕奏復姓永樂辛卯進士授御史

仁宗監國問其名因及其父直學行嘉歎久之以故熊氏父子一旦有聲於京師尋擢廣西按察使復調廣東宣德初擢大理卿詔巡撫兩湖及蘇

松常鎮諸郡所至宣 國恩恤民隱鋤強暴理冤  
滯興學校還奏稱 旨仍巡撫如故屢 賜璽書  
褒之陞南京右都御史頃之 召還掌院事兼署  
刑部事卒于官槩倜儻果斷有才遇盤錯剖決有  
餘所著芝山集公餘稿

朱與言字一諤萬安人永樂辛卯進士歷官湖廣僉  
事遷四川副使黜墨吏抑豪右人以為得憲體擢  
副都御史立朝侃侃有氣節每有封章具切時政  
多見嘉納以疾乞休家居嚴肅如在官鄉人為不

吉安府志

列傳一

十九

四

善者不敢白適縱曰得無使朱公聞之乎其見憚  
如此

陳正倫吉水人永樂壬辰進士授按察御史巡按湖  
廣摘奸剔隱疏每上嘗稱其所奏事具可施行  
上呼為小御史尋陞南陽知府屢上封章多所行罷  
時唐王府驕恣數暴民正倫痛抑之又修復石堰  
水利以興歷陝西四川按察使操履端慎所至有  
惠愛及民學士楊士奇最重之稱為畏友南陽至  
今祠祀焉

陳循字德遵泰和人永樂甲午舉鄉試第一明年入對賜進士狀元及第授翰林院修撰累官侍讀學士戶部侍郎景泰中進戶部尚書文淵閣大學士兼華蓋殿大學士加少保立朝四十餘年寵遇最厚深習先朝典故制命皆出其手天順改元謫居遼東四年得放回籍卒于家所著有芳洲集

彭琉字毓敬安福人永樂戊戌進士時北京營建事嚴委琉督軍夫于畿內復督運木夫于山東口外俱至期集無一亡者以事謫教諭大學士楊士奇

吉安府志

列傳一

二十一

武

薦之授翰林編修預校五倫書纂修宣德實錄尋擢廣東山西督學設條教勸懲士風大振改湖廣副使奉 璽書叅贊廣西軍務明年引疾歸琉性剛而貌嚴燕居無惰容寡嗜慾甘辛苦動以古先儒哲為標準雖違俗不顧也自少至老讀書不倦培養深厚而操執屹不可奪易簣時援筆書曰內不見已外不見人悠然全歸樂哉休也所著有息菴集慎菴集備忘錄

周叙字功叙吉水人永樂戊戌進士選庶吉士歷官

至侍讀學士居禁近三十餘年雖以文字爲職業  
尤注意國事前後章疏論列皆切時政所著有詩  
學梯航唐詩類編

周源字仁本吉水人永樂庶子湖廣鄉薦授浙江德  
清教諭陞天台知縣改內黃內黃民不知紡織制  
紡織具教之每戶月陳布二疋相連中斷而還之  
以爲生因防重點之弊民便利之邑有數里土鹺  
不生五穀民刮土淋水爲鹽以洪賦時鹽禁方嚴  
賦無所出民多流移遂奏免其賦復業者四百餘

吉安府志

列傳一

三二

立

戶當道交薦陞常州知府比至縱囚出外舍約期  
聽理無一亡去者又嘗奏科武進墾田千餘畝以  
補江陰決坍八百餘畝兩邑胥利焉值歲大歉  
朝廷勅重臣賑濟源建白借運兌糧以濟之所活  
甚衆爲天下循吏首稱未幾引疾歸所著有溪南  
集

曾鶴齡字延年泰和人初與兄椿齡同舉于鄉值家  
貧椿齡先會試登第爲庶吉士卒鶴齡獨留家授  
徒養母又十七年爲永樂辛丑始赴會試狀元及

第授修撰預修永樂洪熙宣德實錄累官侍講學士卒鶴齡爲人和厚易直好正人以義而亦能受人言雖嫉邪而無怨之者教人先行後文率多成就子序蒙簡俱舉進士蒙簡少從父官翰林常俸不給蒙簡館授以資之既登第擢御史陞按察使卓有風裁其子追進士及第入翰林爲編修未幾卒皆有文集行世

劉廣衡字克平萬安人永樂甲辰進士歷官至陝西右布政使景泰改元進都察院左副都御史同西

安侯鎮關中條奏時政數十事隣境偏頭乏糧山西不能給廣衡督運綏德倉米數萬石由口外往餉之軍士感悅 召還理院事閩浙間鉅盜鄭懷冒王孝忠嘯聚官臺山爲亂廣衡奉 命討平之以官臺山險絕而曠遠出銀鑛易致盜非伐山通道立縣以制之不可於是請以山之楊梅村置壽寧縣定兵壯戍守之法示銀穴啓閉之令民稱便 立報功祠祀之尋擒斬處州寇祝岳二 命巡撫遼東天順改元以刑部左侍郎 召還見便殿諭

之曰用法無避嫌遷刑部尚書明年以疾乞休未  
行而卒廣衡敷歷中外執法三十餘年仁明剛決  
一統志稱其清修簡朴不事浮靡近古人云子喬  
登進士知歸安擢監察御史持風裁陞福建副使  
有奸人習通私番射利者遇貢舶輒給夷人餽遇  
鎮守三司科取珍貝事發衆欲貸之喬曰不可是  
示外夷以貪使輕中國也必寘諸法歷陞湖廣右  
布政使卒

孫鼎字宜鉉廬陵人鼎性醇謹踐質行爲人所難永

吉安府志

列傳二

二十三

六

樂中舉于鄉授江浦學諭遷松江教授松江士習  
富多肆爲侈縱無檢鼎以理道陶範之常肅衣坐  
堂上終日惜嚮笑寡言語然講解又必盡其說辭  
常曰學莫先孝弟孝弟矣未有不信於友不忠於  
君者其父自廬陵來聞子喪私掩泣見父則懽笑  
惟恐傷親心也諸生貧者分俸給之有劉璣者爲  
寮無狀數累鼎鼎不爲動及璣敗去贈送如禮不  
少介其中乘馬逸入武卒園踐傷蔬武卒怒擊馬  
殺之竦懼自伏鼎慰遣之曰是馬弗良擊殺之固

當遇國喪入臨郡中鼎誤翻著喪冠郡守見之遽  
翻其冠已而鼎前揖守曰公冠翻非禮曰效先生  
鼎曰悞也於是各正其冠其畏慕鼎如此秩滿將  
去諸生詣府乞留守轉以聞遷南畿提學監察御  
史時被教士多爲名人鼎卒門人私謚爲貞孝先  
生

郭循字邦禮廬陵人永樂間進士授刑部主事錄囚  
南京多所伸雪嘗極論營構踰侈忤旨調工部  
遷郎中官至廣東叅政每見苛刻者心深厭之曰

此輩用意毒螫欲飾虛名資寵利耳然既已自絕  
生理鬼誅在室安所善其後哉故其政務溫惠卒  
于官民惻然思之

曾泉字本清泰和人永樂間進士授監察御史左遷  
汜水縣典史蒞政之暇頻課生徒頗爲校官所厭  
乃別選四鄉俊秀自教之三年多成才又教民墾  
田以耕而助其無牛者及導之以樹植漁樵之利  
以是死者得棺以葬貧者得財以養民感其惠立  
生祠祀之事載國史



張景良永新人始爲教諭適永樂間有 詔舉天下  
教官學行優者人試克 皇太孫講讀官時廷試  
五百人拔其儁得八人景良與焉授國子博士進  
仁宗以四書直講 嘉獎之授右春坊司直郎

賜勅褒諭謝事歸省掃起爲順慶通判時中官入蜀  
採辦以在東官時嘗受學於景良乃取府所歛民  
金五百兩遺之景良受焉悉以還前所歛之民或  
難之曰公爲此孰若先拒之足全公廉名景良曰  
斯皆吾民膏血也豈忍借是以沽廉哉言者愧服

吉安府志

列傳二

二十五

明

劉儁字克彥後以字行永新人宣德丁未進士御史  
陞按察僉事所至風裁凜然有接其辭色者邪念  
自消讐嘗稱學莫先於義利之辨毫釐千里舜跖  
之由分也吾黨時當以此自省惕致政歸確守清  
白澹然絕于請人品稱先輩第一爲文雅暢多古  
意所著有木菴集

蕭翼字體全永新人登進士知潛山縣勤心撫字廢  
舉利興丁內艱歸父老遮道攀泣服闋改知長垣  
縣時黃河泛溢民舍漂沒十八九翼身先衆役築

隄以捍河潰發粟賑其災二年民始定立廟隄上  
祀之秩滿入京乞留者數百人請弗可衆號勤而  
去冢宰王公直嘉其績超遷順德知府數月病卒  
行李惟琴一張

梁潛字用之泰和人舊鍾姓也以文學起家繼應薦  
授四會知縣縣有瀧橋河世傳吏廉則河清潛爲  
縣數年河清如一日旣改陽春尋 召入修

高廟實錄書成陞翰林修撰兼右春坊右贊善未幾  
進侍讀爲人方正明決蒞事有程然竟以毀死朝

吉安府志

列傳二

二十六

九

士共出資殯之其妻楊痛夫非命不食數日死子  
黎登第官廣西按察副使陞右布政以服夷才轉  
浙江左布政使天順中應覲京師 詔吏部舉卓  
異方面十人以黎爲首 賜宴及金織衣鈔錠旣  
九載奏最乞歸不允卒于官士民哀之

李湘字永懷泰和人以歲貢爲東平州知州招徠流  
亡勤恤民隱州人德之循例當還 朝百姓遮道  
泣留不可乃有婦女三百餘人詣 闕乞留 詔  
從之又九年進懷慶知府旣去民祠之

蕭和鼎萬安人由歲貢補國子生授工部主事陞貴州銅仁知府至則公廨皆覆以茅乃教民陶瓦又教之櫛髮服冠裳習禮節知老幼親疎之別飲食起居之宜夷俗駸駸變夏民亦甚愛之刻像祀焉因歎曰人性皆善蠻貊可行孔孟豈欺我哉越三載乞致仕歸卒于家

蕭啓字斯陽龍泉人宣德丁未進士初授御史歷陞僉都御史聞父喪兩疏乞守制不許復上疏力言乃許之服除改巡撫山西疏蠲逋負減邊運以甦

吉安府志

列傳二

二十七

嵩

民艱募富民出粟以實邊儲踰年以疾乞致仕歸王佐字功載吉水人宣德丁未進士選庶吉士授刑部主事歷員外郎中居職辨冤獄活無辜死者百餘人奉命錄囚蘇浙多所平反雖久任無躁進意天順間出守臨安至則撫夷獠戒軍衛以德濟威軍民咸戴之事載臨安德政碑

吳節字與儉安福人宣德庚戌進士選庶吉士授編修歷陞侍講侍讀正統己巳之變條陳經國時宜十餘事景泰間陞國子祭酒進俸成化初改大常

少卿兼侍讀學士陞大常卿丁內艱服闋之敘什許之性坦夷真率惡訐直平生耻言人過失常曰雖大舜且隱惡揚善况衆人乎博學瞻文在國子時教諸生必務經世用爲實學常曰詞藻末技况所爲舉業文乎卒于家

萬霽字季丙安福人宣德庚戌進士授陽朔知縣陽朔地僻陋壤土雖沃腴而惰於耕作霽至乃令民墾土田春耕時具酒脯躬自勸勞山地則令樹藝麻粟木棉婦女教令紡織由是陽朔遂爲富邑又

成

吉安府志

列傳二

三

爲新學校選秀民躬爲訓課嫁娶祭教之皆有品節民俗丕變山峒夷出掠當道議舉兵將株連良民霽力陳願以身保民無他活數千人去位陽朔民立祠祀之

李紹字克述安福人宣德癸丑進士選庶吉士授檢討歷陞翰林學士禮部右侍郎知貢舉明年以疾告歸家居六年起署國子祭酒命下而卒紹平生端謹安靜早年性剛直好面折人過晚更爲優容遇事必酌量求當於理當天順初復辟有邀迎

駕功者強與俱紹笑曰諸公自足辦之何事紹及拜侍郎公卿往賀王翽舉酒酹曰李公天選侍郎也蓋譏一時附勢倖進者既告歸數年或諷之曰君疾愈當出必大拜紹曰此味備嘗之矣且賢俊滿朝豈獨少一紹哉所著有拙菴集

蕭暉字仰善泰和人宣德間進士爲人沉靜有幹局嘗爲雲南布政使會有邊警奉勅勦之暉爲宣布德意執其首惡罪治之餘黨悉縱不問有千戶以鬪傷起獄蔓引百餘人連歲疑不決暉一訊得

吉安府志

列傳二

二十九

成

其情雲南遠藩供需率踰制暉盡爲裁省曰官奉自有常度可因而贖貨耶擢湖廣左布政使時工部造漕船歲爲民累暉謂官積木累萬而重賦於民非便言之部民得緩役官至禮部尚書

蕭鎡字孟勤泰和人童而警絕宣德間進士需次于家久乃召試文華殿取鎡等十二人入翰林爲庶吉士授編修陞侍讀進國子祭酒巳巳之歲曾謀於吏部尚書王公直附名諫北征景泰初以老疾辭

監丞而下請贈尋以學士入內閣兼太

子少師進戶部尚書兼文淵閣大學士天順改元  
削鑄爲民成化初有 詔起用而鑑先卒所著有  
成均詞垣尚約三集

曾暈字時升泰和人宣德癸丑進士差營藩王塋事  
歸不受一物楊文貞公亟稱之正統初授刑部主  
事嘗佐戶部侍郎焦公宏備兵吳越焦還揚諸朝  
士曰雖使宿金帛庫不染也文貞公喜贈之詩有  
秋官一味詫清貧之句既陞員外承委典十三司  
奏牘賢名益盛尋陞廣西右叅政改河南有清軍

吉安府志

列傳二

三十一

六

御史檄暈同事欲多功暈不從曰清軍以爲民也  
誣民爲軍可乎竟無一枉者陞山東右布政轉河  
南左布政山東官署相傳有妖暈居而安之在河  
南荆襄盜起暈念王師出征必道河南預命郡縣  
儲糧餉具芟芻候至給之民不知有王師歲饑民  
缺食又賞軍需銀萬兩公私莫辦乃會計開封倉  
糧數多出百萬平價糴之而軍賞亦無缺先行後  
奏皆從其言未幾驛 召陞刑部左侍郎又 命  
巡視浙江許便宜行事至則黜不職官吏百人一

一皆當舉十餘人後可爲臣諸百與罷咸關大體越歲還京署部事有中貴怙寵殺人事覺具奏逮治之衆皆吐舌 旨下竟從其請于是京師咸貴無敢犯者文明年自陳老疾乞致仕許之既陞辭 賜宴寵行居家二十餘年家長曾玄足跡不一至城府久之至人不識其面當道議歲撥供役又有 詔文臣五品以上廉且貧者歲給俸皆固辭不受既得疾顧子弟誦曾子啓手足之章乃卒 翬清風雅操足繼文貞公而優游林泉又兼文貞

公所無之樂人益服文貞公知人晚年自號龍坡居士所著有龍坡集

陳文宇安簡廬陵人舉鄉試第一正統元年舉進士及第授編修預修五倫書是時

英廟方鄉文學之臣有 詔選十員讀書中秘文與在選中稍遷侍講居久之用高少保藪言擢文雲南右布政損銀價節兵輸完逋負均徭賦撫臣條上其事 賜誥旌異之陞廣東左布政未赴驛召拜詹事尋陞禮部右侍郎兼翰林學士叅內閣

政成化初進禮部尚書會簡 正統實錄成加太子少保兼文淵閣大學士卒謚莊靖

王槩字同節廬陵人正統壬戌進士授刑部主事歷郎中凡所訊鞫其僚皆宗讓之遂以善獄稱廷中為湖廣叅政調河南所至郡縣無留牘遷按察使囹圄號為空虛天順初被誣逮繫會襄王入朝首舉槩賢即日赦出之尋陞都察院石劄都御史巡撫陝西陝西歲饑給發振施流逋悉還改大理卿槩所叅繳法吏轉相錄寫為品程成化癸巳陞刑

吉安府志

列傳二

三十二

九

部尚書一洗宿弊上十事咸切時政諸司日進案牘填委裁決如流明年卒于官謚恭毅

左鼎字周器永新人敏悟絕人雄辨喜任俠正統壬戌進士擢監察御史巡按山西遇北虜大侵邊

上既北狩虜遂分衆窺山西鼎聞警即募兵扼險守虜知有備遂引去復遣使議和鼎獨馳奏譬以景德靖康間事衆聽其義久之及天順改元念其功乃自廣東叅議 召還拜都察院左僉都御史尋卒



周鐸字秉訓萬安人正統壬戌進士授刑部主事歷  
郎中用法平恕知德安府循介自守鋤治強梗先  
是德安學頽農惰至則選生儒俊秀者與講習又  
時巡行阡陌督耕種民養而知教不忍其去六年  
報績奏留復任七載民生祠之超拜廣西叅政歷  
陞廣東左右布政使與韓都御史同征海寇時使  
司庫藏有鐵匝木柱數十破之皆黃白金故籍不  
載僚屬欲均利之鐸曰財屬庫帑可得而私耶悉  
聞之兩院時稱方岳政績第一未老乞休歸僚屬

吉安府志

列傳二

三三

明

知其廉致金其家爲贖鐸却之家居密邇僧舍當  
道念其第隘欲以寺基益之鐸力辭爲人敦朴誠  
實歷官數十年以清慎勤著聲

陳宐字公宐泰和人正統壬戌進士擢工科給事中  
嘗建言省迎春冗費以千計著爲令累官都察院  
副都御史會四川大垣寇亂勅同襄城伯李瑾  
率各道兵勦之所向克捷或諷其遣子奏捷可得  
官宐曰此非吾志也拒之尋召拜兵部侍郎宐  
爲人謹厚寬仁官雲南布政時嘗辨出土官昂貴

誣逮論死者二十餘人

劉錯字用甫泰和人正統壬戌進士爲刑部主事比虜入寇條陳十四事皆見採納時朝士有陰遣家屬避寇者錯上章劾之有輕宗社如弊屣忘君父如路人之語疏上得旨命御史詰察衆心始定陞陝西按察司僉事丁母憂改山東且行奏舉復舊制整頓憲綱劾巡撫之不法者十事由是得調雲南尋致仕歸家居蕭然如貧士辨義利不肯苟且絲毫自號鐵心道人晚年又著安民策萬餘言

未上而卒

楊渙字德濟泰和人正統乙丑進士令新會廉謹愛民諸徭歲時相率來聽約束黃蕭養反四境騷動徭民率衆護縣渙慰遣之地產斷腸草民多服草死誣人渙諭來訟者必納此草連根數十斤久之其種遂絕其他善政尤多三年撫臣特奏爲廣東按察僉事又三年卒于官行橐蕭然前後都御史楊信民韓雍葉盛皆甚重之盛輓之以詩曰爲縣炎荒已獨難僑閩當日被劊殘耆民死後兒童老

只說君侯是好官又曰臨終一事託同官祇恐廉  
名負蓋棺千載關西有孫子再將清白與人看四  
會民祠祀之

劉孜字顯孜萬安人正統乙丑進士授監察御史巡  
按遼東自指揮而下殘虐部曲者洗雪殆盡景泰  
初也先犯京師使其王脫脫不花寇遼東孜躬督  
邊將抗禦時京師洶洶有爲南遷謀者孜馳章乞  
斬言遷者以安人心風裁赫著嘗疏薦王儉薛瑄  
俱登要津爲世名臣陞山東按察使劾罷郡守之

吉安府志

列傳一

三五

六

不職者入覲以才行卓異受旌陞山東左布政尋  
晉右副都御史巡撫南畿修周文襄之法列郡倚  
重陞刑部尚書以嚴率其屬移疾乞休未及家而  
卒

羅俊字承彥泰和人正統戊辰進士爲御史景泰中  
謫新會典史興學育材士得指教多起科第天順  
初陞知仁化縣未幾陞潯州知府已又改南雄卒  
于官南雄軍民哀之如失父母俊爲人廉厚有古  
循吏風所著有奏議理冤錄霽軒詩文集若干卷

劉宣字紹和安福人早孤力學補父戍役于盧龍景泰庚午以儒士舉順天鄉試第一明年登進士選翰林庶吉士授編修累官南工部尚書宣重厚優容喜愠不見於色居大常十一年絕缺望爲南司成待諸生誠意藹然教有條式因其材而勉進之琉球諸國遣子弟求就學人曰行故事爾奚庸教宣曰夷狄慕中國而來學不盡心以誨迪之是違抑其良心也外國生俱感悅厚贄金以獻者再固却之外國生以聞被命宣受毋辭宣乃受慶戚

宴坐次未定僉曰須決之劉太常宣歷舉舊制以對遂爲定規於言官往來甚簡曰是非大臣穢邪之地卒贈資政大夫謚文懿宣制行務存大體惡輕改作常曰後生少年輕舉妄動利未至而害先之國家何賴焉人以爲確論

彭烈字肇烈廬陵人景泰辛未進士授監察御史言事忤旨調知縣擢河南守有惠政歷叅政尋陞廣東左布政使益著治迹烈爲人介廉足智居官實嚴適中所決裁雖不動聲色無不當人意清操卓

然不渝其初以疾卒歸裝惟敝篋數事而已

劉敷字叔榮永新人景泰辛未進士授南京監察御史巡江時差錦衣官校虐民奏革之捕斬江上劇賊有功歷陞湖廣按察使起艱改福建陞左布政使入覲值星變條奏十二事多中時弊陞右副都御史巡視浙江改湖廣會靖州苗亂勅進討破賊六百餘寨轉左副都御史引疾歸再起進右都御史掌院事風紀肅然後以老懇辭歸卒于家

王臣字克賓吉水人景泰癸酉鄉薦授南京監察御

吉安府志

列傳一

三七

史後奉命巡視山西解池鹽至則繩貪墨緝奸盜時出納估直一切當興復者靡不舉行池傍地侵於土人者悉理還之官周池築垣塹一百二十餘里塹外爲堰堰下置二十四鋪鋪置邏卒奸人惡不利已騰飛語中撓之臣不爲動自是盜不得私竊商便於鬻販解池之利漸出兩湖兩淮之上邊儲頓增所省三藩清運輸之費無筭事聞璽書褒嘉未幾卒于官解人立祠祀之正德間賜廟額曰忠愛

彭華字彥實安福人景泰甲戌會試第一登進士選翰林庶吉士授編修遷侍讀進侍讀學士翰林學士掌院事擢詹事吏部左侍郎仍兼學士入內閣頃之進太子少保禮部尚書以疾告歸華才識通敏先後纂修人服弊精博卒贈太子少傅謚文思尹直字正言泰和人景泰甲戌進士選翰林院庶吉士授編修進侍講曆禮部侍郎尋改吏兵戶三部兼翰林學士遂入內閣參掌機政加太子少保兵部尚書仍兼學士在翰林曾預修寰宇通志一統志洪熙實錄續通鑑綱目商文毅公輅薦其學問優長在兵部止廷議發兵貴州人服其識居內閣歲餘歸卒謚文和

劉鈺字仗和安福人忠愍公仲子景泰甲戌進士選翰林庶吉士拜監察御史嘗巡福建畿郡遼東愼憲理冤訪民利病而罷行之不務擊搏以張聲威真定有娶婦以淫行爲族人毆死抵死者七人鈺曰此羞惡之心所發也何可深罪中官誣福建都指揮錢輅謀反同官以私忿誣大臣以關門之私

咸辨正之歷官至雲南按察使子縝登成化壬辰  
進士歷官雲南左叅議嘗上責任六卿疏冢宰馬  
文昇覆奏謂其深知治體

傳韶字德音永新人景泰甲戌進士歷任刑部員外  
郎成化改元韶上言四事陞郎中累讞大獄不避  
權勢有盜大廟金盆珠冠者逮繫五六百人韶悉  
心訪究皆得全活出知黃州丁艱服闋改長沙以  
疾辭不起

劉珂字尚珮安福人景泰甲戌進士爲永康令決滯

吉安府志

列傳二

三十九

江

獄有聲改麻城令一日縣庭有巨蛇至階下珂嘿  
祝之蛇忽不見夜夢五人號泣隨蛇入僧寺池中  
詰旦往視得五死屍逮繫寺僧治之具伏謀殺富  
賈五人瘞池中遂正典刑擢御史民爲立去思碑  
歷陞河南按察使時山陝大饑流民載路珂命隨  
在官司發倉粟爲粥糜食之全活無筭陞廣東布  
政使卒

康驥字德良泰和人景泰甲戌進士授按察御史天  
順初宦官武將竊威權費鬻官爵驥抗章論之羣

小交泣訴奏於是有一旨下驥獄拷掠備極而詞氣侃侃如初竟得恩釋後巡按山東比直穎所至以風裁著聲陞福建轉運使

馬聰字體哲永新人景泰甲戌進士授監察御史

英廟回鑾䟽請避位迎復辟謫處州推官決獄不泥成案盜聚銀場謀劫官庫聞其按部至遂迎於道聰從容省諭之反側以安撫按交薦其能後卒於官屬續手書遺其子曰貲不必計饒乏惟其人

吉安府志

列傳二

四十

可槩見矣

彭教字敷五吉水人天順己卯舉鄉試第一癸未會試第二明年擢進士及第第一授翰林修撰成化間陞侍講經筵進說命篇因事納忠詞旨剴切方以匡尊爲己任尋以疾遂卒教執親喪䟽食苦寢哀毀骨立父喪在殯鄰家失火倉皇遷避頃之二百餘家俱燼惟殯室獨無恙人以爲孝感性莊重英毅言動不苟志欲方駕古人未究其用士論惜之



羅璟字明仲泰和人天順甲申進士及第入翰林爲  
編修預修正統實錄成陞修撰陳言六事皆見采  
納 命纂續資治通鑑綱目成進太子洗馬

孝宗在東宮時選侍講讀又五年以憂歸起復未至  
京左道李孜省嚙其不與往還陰中傷之調南京  
禮部郎中及弘治改元冢宰王公恕獨薦之時已  
陞福建提學副使又四年始徵爲南京國子祭酒  
三年疏乞致仕 詔許之所著有冰玉集

阮玘字廷用安福人天順甲申進士授行人屢奉

吉安府志

列傳二

四十一

命使淞閩兩廣河南山東西餽遺纖芥不取既拜  
監察御史嘗監光祿寺痛繩其不法者東直門災  
上言六事皆規切時務復 勅理鹽法及督視運  
河決隄下令有司與民爲期約事集而不擾尋以  
疾卒至無以爲殮平生希古篤行爲時所重

蕭禎字彥祥泰和人天順甲申進士授刑部主事陞  
湖廣僉事以廉幹名歷九載不奏績而歸尋遣中  
使就家起爲副使累官都察院副都御史巡撫陝  
西進南京工部侍郎轉刑工二部尚書以疾休致

性廉潔尤精吏事所至赫赫有聲

張達字時達泰和人天順甲申進士授工部主事曾諫興佛塔卒寢其事出漕運昌梁適歲饑徐淮民相食冒謗發倉賑之活民數千進鴻臚光祿寺卿陞工部右侍郎卒于官達爲人簡靜稱長者整菴先生爲作神道碑

龍伯字庭魁泰和人宋時有孝子震翁者家梅樹六月而花事闌理宗賜旌孝梅龍氏命詞臣盧摯記之盧詩曰南風六月見梅花奇絕西昌孝子家一

吉安府志

列傳二

四十一

點落英千古月夜來喚殺後棲鴉伯其後也伯亦有孝行事父母色溫禮虔母胡疾日侍湯藥夜常露禱爲友人羅太史倫所重成化丙戌進士出知浙慈谿縣清苦恤民興學厲俗葺先賢之祠雪寡婦之冤禱雨龍見頌聲大起卒于官無以爲殮民思之爲立祠焉

袁道字德純吉水人成化壬辰進士爲太平令改宐興太平民爲立祠祀之語在太平志及謝方石所製去思祠記中擢監察御史巡按廣東賊吏多望

風解印綬去尋暴卒陳白沙哭以詩云不負平生  
袁御史嶺南無地著秋霜祀嶺南名宦祠

劉戩字景元安福人成化乙未進士及第授翰林編  
修進侍講弘治改元 命戩使交趾交趾吞占城  
侵緬甸頗崛驚僉難其行戩被 命卽從兩僮乘  
肩輿道南寧直抵其境交人驚曰昔之使者皆航  
海來颺檣蔽洋貿重易奇今豈天人耶何其簡速  
也郊迎館候視昔倍恭陪臣拜跪據 大明集禮  
受之不與交一語至之日頒 詔明日宴畢遂行

交王大恐曰一國生靈命懸天使餽金珠犀象戩  
一不顧旣行復遣陞臣要於路期必致之戩書其  
初入關詩曰歸裝若有關南物一任關神降百殃  
以示之交人益敬悚初戩至交交地苦炎暑其館  
伴進一象骨扇及出關以其扇返之交王遣使入  
謝表有廷臣清白之語進右春坊右諭德踰年卒  
戩配胡氏早盲數請置貳室不聽臨終索紙書曰  
劉伶之鍾旣荷莊叟之骸如遣無一語及家事所  
著有晉軒集

曾彥字士美泰和人成化戊戌 賜狀元及第授翰林修撰滿九載出爲南京翰林院侍讀弘治初召改侍讀與 經筵修成化實錄成進左春坊左諭德尋改南京掌院事侍讀學士滿考赴京乞歸許之歸家三年而卒彥登第時年已五十有四成弘以前稱狀元老成以彥爲首才力敏贍應辨如響嘗因星變言請親大臣重科道語甚激切在春坊時又三上疏一請行久任之法一請 御朝之暇宣內閣及大臣論時政利弊一請寬御史李興彭程謝瑩等三人重罪皆下部覆議允行彥家居極友愛待人誠篤不欺里人稱之

周淵字本深廬陵人成化戊戌進士授鄭州知州率民墾荒地數百頃導河流溉之稍高原授之手激法民利以興撫臺李琰以暴刻陵轢長吏淵不爲屈琰叱隸箠淵淵徐出手本懷中曰刑不上大夫淵固不願撻願歸田琰語塞自悔曰吾良過舉也久之丁艱後改無爲州未幾解官歸所著有一溪

集

張寅字敬之安福人弱冠時嘗從學仲父振烈大器  
中去之冀冀人有憐其才者館穀之補州庠弟子  
成化甲午領應天鄉薦冀人欲妻之寅曰寅嘗聘  
邑人康氏女今南北不相聞者十年矣未可以薄  
行負之既上春官不第乃南歸康氏亦守節以待  
始就婚人兩賢之後登成化辛丑進士令涉縣右  
廉名陞南大興丞卒

歐陽旦字子相安

福人成化辛丑進士授休寧令有

治狀召為御

史民祠祀之弘治初條時政七事

吉安府志

列傳一

四十五

歷官淞江督學

副使應天府尹陞南京都察院右

副都御史仕宦

三十五年清節始終一致平生寬

厚坦夷急人之

難成人之美親戚貴賤咸得其歡

心

李貢字惟正吉水

人成化甲辰進士累官福建按察

使陝西左布政

使尋陞都御史會流賊劉六劉七

猖獗出入幾旬

八府貢嚴申令謹斥埃賊以是不

敢內窺有王指

揮者內結錢寧外與賊通賊所愛

妾善騎射懼為

官軍所獲謀於指揮收匿之貢廉

狀召王來詰責病懲以法擒賊妾以聞竟寘之法  
威名益著未幾擢兵部右侍郎復以忤權貴意不  
欲久居位累疏病歸卒于蕪湖

王懋中字與時安福人成化丁未進士初知南樂教  
民節儉婚嫁以時歲旱且蝗懋中致禱得雨蝗滅  
有大獄十年不決受監司委一訊而平之進刑部  
主事員外郎陞雲南按察僉事歷山東按察使湖  
湘左右布政使擢右副都御史巡撫雲南海口淤  
塞民田百萬餘畝督令所司濬治遂爲沃壤民受

吉安府志

列傳一

四六

交

其利尋以言事忤權貴罷歸己卯寧藩叛都御史  
王守仁知府伍文定討平之懋中與有勞焉嘉靖  
初起巡撫鄖陽尋轉兩京左右副都御史陞南京  
右都御史卒于官贈太子少保

劉丙字文煥安福人成化丁未進士選庶吉士授監  
察御史疏時政六事歷陞閩蜀督學副使遷貴州  
按察使會獠寇狎至守將閉門不出丙獨勤兵固  
守遣騎問入寇之故寇遂引退尋遷四川布政使  
遂擢都察院右副都御史巡撫湖廣朝廷方大

營建遷工部侍郎督採大木悉心區盡各土官樂於應命事方就緒以疾卒贈工部尚書謚恭襄周孟中字時可廬陵人成化間進士授主事遷按察僉事都勻苗不靖聞孟中行部爲寢其謀擢按察使臺臣言天下方面臣治行宜褒表者孟中遂遷浙江右布政尋陞廣東左使薄征輸務寬大抑浮靡定婚娶節縮採珠官與公府之繁費歲率損一五六遏權璫不得居奇利威惠大行壬戌入覲言者舉故事旌殊尤吏部上孟中等六人孟中

吉安府志

列傳二

四十七

工

乃懇疾歸辭旨甚哀進都察院右副都御史致仕孟中自少有大志引義富人者素畜施族

有貧士不分一錢孟中既仕歸富人爲具大饗孟中就座中歎曰若我輩人焉取此卽以急肉骨貧士誠大惠戴爾德不忘且亦得威蹠緩急之齊也其人大愧悟由此開警稍稍振給困乏其用情引人善如此居官所至有威名然慈柔人親愛之

鄧鼎字廷噐泰和人幼讀小學書見諸葛武侯范文正公事皆書願學字字篇稍長從羅大史倫游有

造詣成化間進士知鄧州鋤豪強厲士風賑饑察獄全活甚衆鄧人德之後改睢州修學築堤有功陞南京刑部郎坐治獄執議忤富道意遂告歸鼎事父孝事兄如事父居官所入俸給散其族人所至以才名未竟于用而卒

曾顯字克達泰和人成化間鄉舉分教寧波陸滁州知州改宿州再改靖州陞楚雄府同知皆有惠政民肖像祀之立去思碑用薦擢雲南按察司僉事濬滇海城平夷工費鉅萬民不告勞輶車所至郡

邑蕭清致仕居家蔬食布衣一如貧士平居樂善不言人過失賑窮周乏若切渴饑鄉人至今誦之鍾鯨字樂海廬陵人成化間鄉舉爲瀘溪令起艱改新興日攻苦食淡行簡易以綜民事故事縣官率詭大府歲倍馬夫直以進鯨曰剝下以奉上吾不爲也卒以正額上之守謂慢已坐捃誣下獄當道廉得其情欲與更縣鯨曰以爲有罪誠願斥罷若其無罪何必更徒日越傳舍爾卒不更守故紛亂折抑之而鯨益自持甚強竟卒于官



曾望宏字實夫泰和人成化間舉進士授刑部主事  
歷員外郎中有剽劇才凡諸司掣肘者大司寇悉  
付之曰非曾郎中不可有駙馬奏爭民田望宏廉  
得其實悉歸之民奏報稱 旨又出誣執左道百  
餘人勘中貴官與皇親互訴事各歛服尋擢知常  
州府至則表節義抑豪強勸農造士政治有聲改  
知南雄南雄爲廣東通道所出外夷奇物負客多  
携過其境望宏持法謹嚴行者避之

彭龍字舜卿龍泉人以鄉薦弘治間授東昌判職馬

吉安府志

列傳一

四十九

戶

政時馬政久敝馬戶率多流散龍至興利補敝以  
廉勤任事條奏馬政五事極言儀馬責駒均役安  
民之方下其議行之未究而卒四壁蕭然無以爲  
殮民哀之如失所親視歸舟中無長物惟妻子扶  
視形影相弔而已龍少貧苦學博極羣書不輟寒  
暑教授弟子盈門束修之入悉以周族之貧者清  
修蓋得諸天植云

徐穆字舜和吉水人弘治癸丑進士及第授翰林編  
修遷侍讀正德改元 命充正使頒正朔于朝鮮

賜麒麟服以往及境正郊迎道跪之儀朝鮮屈服  
既還有所饋獻悉扣弗納時逆瑾用事嗾人言文  
士不習世故宜令練達政事調穆爲南刑部員外  
郎改南兵部會瑾敗穆復爲侍讀尋卒先是吏部  
以翰林春坊多缺員既列諸有資望者以上穆名  
在疏中得 俞旨至是特進侍讀學士蓋殊恩也  
穆博學有才識凡 國朝故實兵民利病四方地  
理險易俗尚物態之故若指諸掌議論英發所爲  
詩文雅贍有思致不事鍛鍊嘗曰辭達而已矣享

年不永士論惜之

周魯字淳夫吉水人弘治癸丑進士授監察御史歲  
秋當審錄舊例官防甚嚴絕饋食或重刑囚多瘦  
死魯悉除煩苛出諸囚庭諭之囚皆感泣待罪嘗  
抽分蘆溝橋木雖外戚貴寵者不少假借京師夏  
雷大震魯疏去冗職罷銀礦便軍餉通路引數事  
時有以司馬遷冢宰者十三道以爲不可欲言之  
無當先者魯笑曰言官畏言耶首署名以進尋與  
戴都憲珊論差法不合引疾乞休魯素尚風節家

居僻處鄉村布蓋徒步不履公府當道以行誼薦  
竟不起卒于家

鄒賢字恢才安福人弘治丙辰進士初授大理評事  
上疏請定三年終制之禮別祀叔梁紇以顏路曾  
皙孔鯉配律例贖罪宜將錢鈔兼估庶刑罪得中  
時論躋之陞福建汀漳兵備僉事時逆瑾用事方  
面官率入謝獨不往携二僮赴任裁損供億選兵  
捕寇功甚多尋乞致仕歸性至孝父病淋爲吮之  
而愈士論稱其孝不移於已貴可以爲勸云

吉安府志

列傳二

五十二

劉潮字主信安福人弘治己未進士授大理評事累  
官廣西按察副使平賓州入寨劇盜民賴以安解  
官歸嘉靖間錄其功陞按察使未赴以疾卒先是  
宸濠殺長史莊典妻子無所歸潮買地居之時宸  
濠威制江右道路以目或危之潮不爲動時論賢  
之

劉子厲字克溫安福人弘治己未進士初授嘉善令  
嘉善故繁劇子厲爲之縣以大治縮費均役緩刑  
懲奸暇日進諸生講析疑義士民並附之用治行

召入爲監察御史嘉善民勒石志思未幾逆瑾執柄斥不附已誣逮下獄落職瑾敗起按福建尋卒周尚化字德夫秦和人正德戊辰進士授知邳州初下車流賊且至尚化預築土城捍禦之旣通州議者欲闔門固守尚化曰城外非吾民耶不聞唇亡齒寒乎因合城內外民諭之以義誓共死守未幾寇擁騎數萬四而攻圍連日不可克乃解去民賴全活勒石紀功立生祠祀之尋陞南京刑部員外郎以憂去尋卒

劉翀字士鳳永豐人正德辛未進士官至郎中廉靜謙約雅操堅貞年三十五告病歸寓居郡之金牛寺其貧嗜學冲然若一寒士至有不識爲劉正郎者旣卒無以爲殮邑中稱之曰臨事任難剛執素昭於士論居貧不苟孝廉尤重於鄉評